

I. kafli. Heiti félagsins, heimili og hlutverk

1. gr.

Félagið heitir Nemendafélag Menntaskólans á Ísafirði. Heimili þess og varnarþing er á Ísafirði.

2. gr.

Hlutverk félagsins er:

1. Að standa vörð um sameiginlega hagsmuni nemenda.
2. Að stuðla að blómlegu og kröftugu félagslífi á meðal nemenda í MÍ.
3. Að efla tengsl nemenda innbyrðis, sem og við aðra skóla.

3. gr.

Tilgangi sínum hyggst félagið ná með því:

1. Að halda almenna félagsfundum eins oft og þurfa þykir.
2. Að styðja nemendur í því sem þeir eru að aðhafast í félagsstörfum.
3. Að efna til ýmissa upptákoma og mannfagnaða.

II. kafli. Félagsmenn

4. gr.

Allir þeir nemendur sem borga gjald til Nemendafélagsins eru sjálfkrafa félagsmenn.

5. gr.

Allir skuldlausir félagsmenn skulu fá afhent nemendafélagsskírteini. Skírteinið veitir aðgang að starfsemi félagsins og skal framvísa því þegar þess er krafist.

6. gr.

Stjórn félagsins getur því aðeins vikið mönnum úr félaginu ef þeir uppfylli ekki þær kröfur sem um er getið í 4. gr.

7. gr.

Annargjald hvers félagsmanns er ákveðið hlutfall af skólagjöldum hans til MÍ sem hann borgar við upphaf hverrar annar. Reikningsár félagsins er frá 1. apríl til 31. mars.

III. kafli. Aðalfundur

8. gr.

Aðalfundur hefur æðsta vald í málefnum félagsins.

9. gr.

Aðalfundur skal haldinn í apríl ár hvert. Til hans skal boða með áberandi hætti, s.s. með auglýsingum á upplýsingatöflum, eða á annan tryggilegan hátt. Boða skal til hans með minnst viku fyrirvara og er hann þá lögmætur. Afl atkvæða ráða úrslitum mála, nema annars sé getið í þessum lögum.

10. gr.

1. Stjórn félagsins gerir grein fyrir störfum félagsins.
2. Stjórnin leggur fram endurskoðaða reikninga félagsins.
3. Lagabreytingar.
4. Kosning stjórnar.
5. Kosning tveggja skoðunarmanna reikninga. endurskoðenda og tveggja til vara-
6. Kosning kjörstjórnar.
7. Önnur mál.

11. gr.

Lögum félagsins er bæði hægt að breyta á aðalfundi félagsins sem og á almennum félagsfundum. Tillögur til breytingar á lögnum verða ekki teknar til meðferðar nema a.m.k. helmingur félagsmanna sækir fundinn. Í fundarboði skal þess getið að tillögur til lagabreytinga liggi fyrir. Ef tillögurnar eru samþykktar af meirihluta fundarmanna öðlast þær strax gildi. Ef tilskilinn fjöldi félagsmanna sækir ekki fundinn skal efna til framhaldsaðalfundar. Sá fundur er þá lögmætur án tillits til fundarsóknar.

12. gr.

Formanni er skylt að boða til félagsfundar ef þriðjungur félaga eða meirihluti nemendafélagsstjórnar krefst þess.

IV. kafli. Stjórn félagsins

13. gr.

Stjórn félagsins skal skipuð átta mönnum. Þessir átta menn eru: forseti, féhirðir, ritari, menningarviti, formaður málfundarfélags, fulltrúi nýnema, formaður vídeóráðs og formaður leikfélagsins. Þessa embættismenn skal alla kjósa sérstaklega. Allir þeir sem rétt eiga á að sitja aðalfund, þ.e. allir fullgildir félagsmenn, eru kjörgengir í allar stjórnir, ráð, nefndir o.s.frv.

14. gr.

Forseti nemendafélagsins er yfirmaður nemendafélagsins og fulltrúi þess út á við. Forseti er staðgengill féhirðis, en öðlast þó ekki atkvæðisrétt féhirðis í fjarveru hans. Hann skal leitast við að efla einingu félagsmanna NMÍ og stuðla að öflugu og fjölbreyttu félagslífi. Formaður skal vera kominn á þriðja námsár er hann tekur við embætti.

15. gr.

Féhirðir hefur umsjón með fjármálum félagsins og ber ábyrgð á þeim. Hann skal funda einu sinni í mánuði með fjármálastjóra MÍ og skila mánaðarlegu uppgjöri. Féhirðir er staðgengill formanns, en öðlast þó ekki atkvæðisrétt hans í fjarveru hans. Féhirðir skal vera orðinn átján ára við upphaf þess skólaárs sem hann situr í embætti.

16. gr.

Ritari sér um fundargerðir á öllum fundum félagsins. Ritari er ritstjóri skólablaðsins og formaður ritnefndar. Ritari hefur yfirumsjón með heimasíðu Nemendafélagsins sem er facebooksíðan Nemendafélag MÍ.

17. gr.

Menningarviti er formaður Sólríshátíðarnefndar og ber ábyrgð á undirbúningi hátíðarinnar.

18. gr.

Skólaráðsfulltrúar. Meðlimir stjórnarinnar ákveða sín á milli hverjir þeirra skuli gegna störfum skólaráðsfulltrúa, en þeir eru tveir. Þeir skulu vera tengiliðir dagskólanemenda við yfirvöld skólans. Berist skólaráðsfulltrúa ósk frá dagskólanemanda um að ákveðið mál skuli tekið upp á skólaráðsfundi ber honum að verða við þeirri ósk.

19. gr.

Skólanefndarfulltrúi er tengiliður nemenda við skólanefnd og skal hann vinna að hagsmunamálum nemenda þar. Forseti nemendafélagsins situr sem áheyrnarfulltrúi í skólanefnd og gjaldkeri er varamaður hans.

20. gr.

Formaður vídeóráðs hefur yfirumsjón með vídeóráði skólans. Hann skal sjá til þess að vídeóráð sinni kynningarvinnu og útsetji sketsamyndbönd með reglulegu millibili.

21. gr.

Formaður málfundarfélagsins hefur yfirumsjón með skipulagningu málfunda á vegum NMÍ. Hann/hún er einnig tengiliður skólans við Gettu Betur, spurningakeppni framhaldsskólanna og Morfís, Mælsku- og rökræðukeppni framhaldsskóla á Íslandi. Er það á ábyrgð formanns málfundarfélagsins að MÍ taki þátt í báðum þessum keppnum.

22. gr.

Formaður leikfélagsins hefur yfirumsjón með Sólrísuleikriti skólans. Hann/hún sér um að halda uppi virku leikfélagi.

23. gr.

Kosið skal um fulltrúa nýnema að hausti þegar ný önn byrjar. Boðað skal til kosninga ekki seinna en 2 vikum eftir skólasetningu. Aðeins nýnemar við skólann mega bjóða sig fram í þessa stöðu. Fulltrúi nýnema skal sjá til þess að það sé hlustað á nýnema og að þeir taki virkan þátt í félagslífi skólans. Hann er fullgildur stjórnarmeðlimur og sinnir störfum á vegum stjórnar. Fulltrúi nýnema skal einnig sjá um markaðssetningu á samfélagsmiðlum nemendaráðs í samráði við ritara

24. gr.

Stjórn félagsins ræður málefnum félagsins með þeim takmörkunum sem þessi lög setja. Stjórnin tekur allar nánari ákvarðanir um starfsemi félagsins og ber ábyrgð á fjárreiðum þess. Hún skuldbindur félagið gagnvart öðrum aðilum og dugir undirskrift formanns og gjaldkera til þess. Stjórnin er ábyrg fyrir félagslífinu, hún á að hafa frumkvæði að sem flestu og þarf að vera í góðum tengslum við nemendur. Stjórnin á að gera allt sem í hennar valdi stendur til að virkja nemendur í félagslífinu.

25. gr.

Stjórnin skal funda reglulega, minnst einu sinni í viku ef einhver starfsemi er í skólanum á annað borð. Stjórnarmenn koma sér saman um hentugan fundartíma, en utan reglulegra funda boðar formaður fundi ef hann telur þörf á. Formanni er einnig skylt að boða til fundar ef meirihluti stjórnarmanna óskar eftir því. Félagsmenn hafa rétt til að sitja stjórnarfundi með málfrelsi og tillögurétt, en stjórnin hefur þó rétt til að halda lokaða fundi ef hún telur það nauðsynlegt. Að minnsta kosti fjórir stjórnarmenn verða að sitja fund svo að hann sé ákvarðanafær. Ef upp koma deilumál á stjórnarfundum sér formaður um að þau séu útkljáð þannig að sátt sé um þau. Takist það ekki lætur hann fundarmenn kjósa um þau og ræður þá afl atkvæða úrslitum. Gerðir stjórnarinnar skulu bókfærðar.

26. gr.

Komi upp óánægja meðal félagsmanna um ákvörðun stjórnar nemendafélagsins, geta þeir með undirskriftalista krafist þess að boðað verði til félagsfundar, sem hefur þá úrslitavöld í málinu. Á listanum verður að vera nöfn a.m.k. 1/3 hluta félagsmanna.

27. gr.

Vantraust. Þriðjungur nemenda getur líkt og í 24. gr. knúið stjórnina til að boða til fundar þar sem greidd skulu atkvæði um vantraust á stjórnina eða einstaka embættismenn. 2/3 hlutar félagsmanna verða að greiða atkvæði með vantrausti teljist það samþykkt. Ef tilskilinn meirihluti samþykkir vantraust skal stjórnin, eða sá embættismaður sem á í hlut, segja af sér. Þá skal boða til félagsfundar þar sem kosið skal upp á nýtt í þau/það embætti sem losnar.

V. kafli. Klúbbar, ráð og félög

28. gr.

Vídeóráð skal annast kynningarmál fyrir viðburði nemendafélagsins. Einnig skal ráðið sýna sketsamyndbönd með reglulegu millibili. Formaður vídeóráðs skal skipa fulltrúa í ráðið í samstarfi við aðra nefndarmenn nemendafélagsins.

29. gr.

Tilgangur íþróttafélagsins er að bjóða upp á og halda uppi fjölbreyttu íþróttalífi í skólanum. Tilgangi íþróttafélagsins skal lýst nánar í lögum um Íþróttafélag MÍ.

30. gr.

Málfundarfélag skal annast öll dagleg afskipti NMÍ er tengjast Gettu Betur og Morfís. Félagið skal skipað þremur til fimm fulltrúum, skipaðir af formanni, auk formanns.

31. gr.

Leikfélag NMÍ skal hafa yfirumsjón með Sólrísuleikriti skólans. Félagið er skipað þremur til sex fulltrúum, skipuðum af formanni, ásamt formanni.

32. gr.

Sólríshátíð. Framkvæmdanefnd Sólríshátíðar sér um skipulag og framkvæmd Sólríshátíðarinnar. Allir þeir félagsmenn sem áhuga hafa á málefnum geta setið í nefndinni.

33. gr.

Innan nemendafélagsins skulu starfræktir þeir klúbbar sem næg þáttaka fæst til hverju sinni. Á hverju hausti skal boðið upp á þá klúbba sem áður hafa verið starfandi. Ef vilji er til að stofna aðra klúbba en þá sem fyrir eru er öllum félagsmönnum heimilt að gera það. Stjórn nemendafélagsins þarf þó að samþykkja viðkomandi klúbb ef hann á að starfa í nafni félagsins.

34. gr.

Stýrimenn klúbba bera alla ábyrgð á starfsemi viðkomandi klúbbs.

VI. kafli. Ýmis ákvæði

35. gr.

Ef fram kemur tillaga um að slíta félaginu eða breyta nafni þess, þá skal hún sæta sömu meðferð og tillaga til lagabreytingar sbr. 11 gr.

36. gr.

Kjörstjórn skal starfa innan nemendafélagsins og skal hún kosin á aðalfundi. Fulltrúar í kjörstjórn eru þrír, og ákveða þeir innbyrðis hver þeirra skuli vera í forsæti. Kjörstjórn situr á milli aðalfunda og sér um allar kosningar innan félagsins á tímabilinu. Fulltrúum í kjörstjórn er óheimilt að bjóða sig fram í kosningum nema að undangenginni afsögn, og skal þá kjósa annan fulltrúa til starfa á næsta félagsfundi. Kjörstjórn skal ávallt gæta fyllsta hlutleysis.